

CONVENIO REGULADOR ENTRE O CONCELLO DE ARTEIXO E A BANDA DE MÚSICA SANTIAGO DE ARTEIXO PARA A COLABORACIÓN EN DISTINTAS INICIATIVAS MUSICAIS DURANTE O ANO 2019 NO CONCELLO DE ARTEIXO-A CORUÑA-

Dunha parte Don Carlos Calvelo Martínez, con DNI 32.824.251 P, actuando en nome e representación do Concello de Arteixo (en adiante o Concello) do que é alcalde, con enderezo na Praza Alcalde R. Dopico, nº1 e no exercizo da facultade que se lle outorgou polo acordo adoptado na Xunta de Goberno Local na que se aprobou este convenio.

Doutra parte Don Diego Romero Rial, con DNI 34.893.707 Q, actuando en nome da Banda de Música de Música Santiago de Arteixo (en adiante a Banda) da que é presidente, co número de CIF V15732506, e con enderezo social no Centro Cívico Cultural de Arteixo, situado no paseo fluvial de Arteixo.

EXPOÑEN

De conformidade co disposto no artigo 1 do RDL 781/1986, o Concello de Arteixo ten plena capacidade para obrigarse.

En virtude do artigo 25.2 da Lei 7/1985, do 2 de abril de BRL, e a modificación introducida pola Lei 27/2013, do 27 de decembro, de racionalización e sustentabilidade da Administración Local o Concello de Arteixo é competente para o desenvolvemento de actividades culturais.

Comprobado que a Banda ten plena capacidade para asinar o presente convenio e non se atopa incurso en ningún dos supostos do artigo 13 da Lei 38/2003, de prohibición para obter subvencións ou axudas públicas.

Considerando que o obxecto do presente convenio é a colaboración para a difusión da música a través dun grupo bandístico local non profesional, e que non se atopa dentro do ámbito obxectivo da Lei 30/2007, do 30 de outubro, de contratos do sector público.

Considerando que, de conformidade co previsto no artigo 28.1 da Lei 38/2003, de 17 de novembro, xeral de subvencións, os convenios serán o instrumento habitual para canalizar as subvencións previstas nominativamente nos orzamentos das corporacións locais, e que nas Bases de execución do orzamento municipal de 2019, se contempla xa a concesión dunha subvención nominativa a favor da Banda de 24.000,00 €.

Considerando a existencia de crédito orzamentario axeitado e suficiente polo importe de 24.000,00 € na aplicación orzamentaria 334.48901.

Considerando que consta acreditado no expediente que o beneficiario se atopa ao corrente coas súas obrigas tributarias coa Facenda estatal, autonómica e co Concello de Arteixo. Igualmente consta acreditado que se atopa ao corrente coas súas obrigas coa Seguridade Social e asemade consta declaración responsable do beneficiario relativa a outras subvencións e/ou axudas recibidas con idéntico destino, a non ter cantidades pendentes derivadas de

expediente de reintegro de subvencións, así como de non atoparse en ningunha das prohibicións para ser beneficiario de subvencións.

Considerando que, de conformidade co previsto no artigo 2 da Lei 38/2003, de 17 de novembro, a subvención de referencia cumpre os seguintes requisitos:

- a) A entrega se fai sen contra prestación directa dos beneficiarios.
- b) A entrega está suxeita ao cumprimento do obxectivo, proxecto ou actividade, debendo o beneficiario cumprir as obrigas materiais e formais que se establezan.
- c) O proxecto, acción ou situación financiada teñan por obxecto unha actividade de utilidade pública ou interese social ou de promoción de finalidade pública.

Verificado o carácter excepcional da Banda de Música Santiago de Arteixo, por ser a única existente no concello con especialidade na música de bandas e recoñecida musicalmente polos premios acadados, o que a fai idónea para realizar o obxecto do presente convenio e xustificando así a exclusión da concorrencia competitiva.

E, tendo en conta a vontade de ambas partes por establecer liñas de colaboración para realizar a promoción da música dentro do noso concello e para satisfacer unha necesidade social e cultural da poboación, compartindo obxectivos tales como: ofrecer unha nova visión da música na actualidade, fomentar a participación do público nas actividades e concertos musicais, cultivar o crecemento musical e a formación continua.

Tendo en conta, ademais, que ambas as dúas partes recoñécense con representación e con poder bastante para asinar o presente convenio con vixencia durante o ano 2019.

Por todo o exposto, establécese a regulamentación neste convenio a través das seguintes

CLÁUSULAS

PRIMEIRA: XUSTIFICACIÓN DA CONCESIÓN DIRECTA DA SUBVENCIÓN

O Concello, dentro das súas competencias, que lle foron atribuídas pola lexislación vixente, e no referente ás actividades e instalacións culturais, ten entre os seus propósitos a formación, fomento, promoción e produción de actividades musicais, deseñando e desenvolvendo actividades desta índole de interese xeral.

A Banda, constituída no ano 2.000 ao abeiro da súa normativa específica, é a única destas características no municipio e conta con máis de cincuenta integrantes organizados como conxunto instrumental de vento (metal e madeira), corda e percusión. No 2012 crea unha sección xuvenil coa que se pretende formar a calquera músico/a independentemente da súa capacidade musical. Mantén, ademais, unha estreita colaboración coa labor desempeñada pola Escola Municipal de Música como entidade propia. É identificada por toda a cidadanía e constitúe un punto de referencia estable no proxecto musical do pobo, sendo fundamental o seu papel de promoción e difusión da mesma. Cumpre un papel importante para o coñecemento, apoio didáctico e formación musical dos seus compoñentes e, dende a súa

creación, un papel decisivo para dar a coñecer á veciñanza do concello os mellores temas da música clásica, moderna e contemporánea, en todos os xéneros e estilos e na promoción e difusión de distintos proxectos musicais. Ao mesmo tempo, dende a súa orixe, representa ao Concello en moitos actos institucionais, tanto dentro como fóra do municipio.

SEGUNDA: OBXECTO DA SUBVENCIÓN

A Banda colabora en satisfacer os intereses culturais e inquiredanzas musicais do Concello e dos seus habitantes, mediante o desenvolvemento dunha dobre labor sociocultural e educativa, así como contribúe á conservación do patrimonio musical municipal, nos termos indicados no presente convenio.

Para o presente ano conta cun novo proxecto musical e social co que pretende ampliar os seus espazos de referencia, participar en accións de cooperación, integrarse en proxectos unidos ao ámbito da música, a cultura ou a creatividade e tamén vencellados ao desenvolvemento local ou proxectar as actividades ao espazo global, para que se convertan en novos retos para a mesma. Polo tanto, precisa dunha axuda económica que lle permita canalizar toda esta oferta sociocultural. Todo isto sen esquecer que en Galicia existe unha tradición moi grande de bandas de música que é inseparable da nosa cultura popular e que, polo tanto, non pode deixar de estar presente naqueles espazos onde exista unha celebración festiva que reclame e enriqueza a súa presenza.

É, polo tanto, obxecto do presente convenio a colaboración entre o Concello e a Banda para:

- A formación dos máis de 80 músicos, tanto da sección xuvenil coma da sección senior.
- A celebración do Encontro de Bandas no período estival.
- A realización de concertos: na honra da patroa da música Santa Icíá, didácticos, en colaboración con ONGs, homenaxes a grandes intérpretes, Nadal...
- A confraternización, dentro e fóra de Galicia, para coñecer outras bandas ou proxectos que motiven aos seus membros
- Colaboración en grandes eventos, neste caso acompañando a Serafín Zubiri e/ou Gisela nos seus concertos durante as Festas do Santiago Apóstolo 2019.
- O mantemento do persoal de dirección (2 directores) necesario para as 2 formacións que existen no seo da asociación.
- A súa ineludible participación nas distintas festividades parroquiais de Arteixo e/ou outros eventos relevantes para o Concello para enriquecer os distintos actos festivos, como as festas das Flores e do Santiago Apóstolo, a realización de novas actividades cos reforzos musicais necesarios para elevar o nivel interpretativo da agrupación e o nivel de motivación do persoal, así como a execución dos ensaios semanais dende setembro a xullo, cun total de 4 horas semanais a sección xuvenil e 3,5 horas a sección senior, sen descartar unha maior inmersión e divulgación musical (campamentos, audicións, certames, cursos, xornadas de convivencia, intercambios...).

As condicións que rexerán este convenio serán as seguintes:

- a) O seu período de vixencia será dende o 1 de xaneiro ao 30 de novembro de 2019.
- b) A Banda fará constar que estas actividades son financiadas polo Concello de Arteixo, incorporando a imaxe corporativa do Concello e da Concellaría de Cultura en todos os soportes publicitarios que realicen das actividades financiadas con fondos municipais.
- c) Para o desenvolvemento deste convenio, así coma a matización de calquera aspecto que poida plantexarse na interpretación do mesmo, a interlocutora e responsable municipal será a/o concelleira de cultura.
- d) O Concello, tendo en conta a opinión da Banda e o seu carácter de non profesional, establecerá as accións prioritarias para este ano, procurando seguir criterios de oportunidade e calidade artística.
- e) A Banda se compromete a que a aportación económica recibida do Concello reverta no propio grupo para cubrir as súas necesidades ou as melloras que se consideren e que sexan susceptibles deste convenio.
- f) O Concello facilitará á Banda os contactos e calquera información de utilidade que consten no SM de Cultura para a realización das accións comprometidas, sendo competencia da Banda contactar coas/os interesadas/os.

TERCEIRA: OBRIGAS DA ENTIDADE BENEFICIARIA

-Destinar os 24.000,00 € (vinte catro mil euros), durante o período de vixencia da presente subvención cultural, para sufragar gastos varios das actividades conveniadas (formación, contratación de músicos, pagamento de directores, contratacións artísticas...), sempre que non supoñan realización de investimentos.

-Ofrecer dous formatos de actuación nas súas colaboracións: formato tradicional (pasacalle + procesión) ou ben formato de concerto, en ningún dos casos por un tempo inferior a 45 minutos e cun mínimo de 20 intérpretes.

-Colaborar co Concello de Arteixo, segundo as canles que se establezan en cada momento.

-Incorporar novos músicos, formándoos e axudándoos nos seus estudos musicais, e comprometéndose a manter un número mínimo de 30 membros e os materiais e uniformes necesarios para as súas actuacións.

-Programar actividades que fomenten a convivencia do grupo e o coñecemento dos seus membros.

-Incluír en todos os seus concertos, producións, espectáculos e publicacións a imaxe corporativa que nese momento teña establecida o Concello de Arteixo e a Concellaría de Cultura e Festas.

-Responsabilizarse dos membros da Banda, tanto en accidentes como en responsabilidade civil, dentro e fóra do concello de Arteixo, subscribindo as correspondentes pólizas.

-Cumprir o obxectivo, executar o proxecto, realizar a actividade ou adoptar o comportamento que fundamenta a concesión da subvención.

-Xustificar ante o órgano que concede a subvención o cumprimento dos requisitos e condicións, así como a realización da actividade e o cumprimento da finalidade que determinen a concesión ou goce da subvención.

-Someterse ás actuacións de comprobación a efectuar polo órgano que concede a subvención así como a calquera outra actuación, sexa de comprobación e control financeiro, que poidan realizar os órganos de control competentes, tanto autonómicos como estatais ou comunitarios, achegando tanta información lle sexa requirida no exercicio das actuacións anteriores.

-Comunicar ao órgano que concede a subvención a obtención doutras subvencións, axudas, ingresos ou recursos que financien as actividades subvencionadas, así como a modificación das circunstancias que fundamentaran a concesión da subvención. Esta comunicación deberá efectuarse no momento no que se coñeza e, en todo caso, con anterioridade á xustificación da aplicación dada aos fondos percibidos.

CUARTA: FINANCIAMENTO

O Concello de Arteixo comprométese a conceder 24.000,00 € á Banda polos conceptos xa mencionados anteriormente neste convenio e que deberán encadrarse entre os meses de xaneiro a novembro de 2019.

A presente subvención é compatible coa percepción doutras axudas, ingresos ou recursos para a mesma finalidade, procedentes de calquera administración ou entes públicos ou privados, estatais, da Unión Europea ou de organismos internacionais, pero en ningún caso, illadamente ou en concorrencia con outras subvencións, axudas, ingresos ou recursos, poderá superar o custe da actividade subvencionada.

QUINTA: OBRIGAS DO CONCELLO

-O Concello comprométese a ceder o uso gratuíto dos auditorios municipais para os ensaios necesarios e os concertos que realice a Banda, sempre e cando exista dispoñibilidade, polo que deben solicitarse nos modelos normalizados coa suficiente antelación para obter a autorización pertinente.

-Unha vez xustificado debidamente nos termos da lexislación vixente o cumprimento do obxecto da subvención, e fiscalizado de conformidade, o Concello comprométese ao recoñecemento da obriga e ao pagamento da subvención.

-Para o recoñecemento da obriga é imprescindible a execución íntegra do obxecto da subvención no seu labor sociocultural e educativo, así como de conservación do patrimonio, o que deberá ser valorado polo órgano de xestión responsable da área, e debidamente xustificado.

-Autorizar á Banda a utilización dos locais denominados aula 4 como domicilio social, e a sala dos espellos como sala de ensaios, así como un armario para os traxes, todos eles situados na planta baixa do CCC de Arteixo, debendo respectar dita banda os periodos vacacionais do persoal e renovar a súa solicitude antes do inicio de cada curso escolar.

-Apoiar a relación de intercambio cultural e musical con outras localidades ou entidades.

SEXTA: XUSTIFICACIÓN DA SUBVENCIÓN

A Banda comprométese a xustificar antes do 10 de decembro do ano que andamos a cantidade acordada, con todos os documentos necesarios nos termos do artigo 28 da Lei de subvencións de Galicia 9/2007 e, en todo caso, antes de rematar o exercicio 2019.

Deberá xustificarse o 100% do importe subvencionado para a percepción íntegra da subvención; unha menor xustificación dará lugar a un recoñecemento proporcional da axuda comprometida, aplicando unha regra de tres para o cálculo.

Para o cobro da subvención concedida será requisito imprescindible a presentación previa da conta xustificativa que terá o seguinte contido mínimo, tal e como establecen os artigos 72 e 75 do RD 877/2006, de 21 de xullo:

- a) Memoria de actuación xustificativa do cumprimento das condicións impostas, indicando as actividades realizadas e os resultados obtidos.
- b) Presentación dos documentos de xustificación da actuación realizada segundo o modelo que se achega con este convenio.
- c) Relación doutras axudas ou subvencións recibidas para a mesma actividade, indicando o importe e a procedencia.
- d) Carta de pagamento de reintegro no caso de sobrantes non aplicados.

O prazo para presentar esta conta xustificativa rematará o 10 de DECEMBRO do 2019.

SÉTIMA: INFRACCIÓNS E SANCIÓN

Ao vencemento do prazo de xustificación sinalado nas bases, sen que a entidade presentase a documentación xustificativa, a unidade xestora requiriráa para que a presente no prazo improrrogable de 15 días dende a notificación.

A falta de presentación da documentación neste prazo suporá a renuncia á subvención outorgada, sen prexuízo das responsabilidades dispostas na Lei xeral de subvencións.

A presentación da documentación neste prazo excepcional non eximirá a entidade beneficiaria da sanción que lle corresponda segundo a seguinte gradación:

Atraso na presentación da xustificación ata un mes: sanción do 10% do importe da subvención, co límite de 250 €.

Atraso na presentación da xustificación dun mes ata tres: sanción do 20% do importe da subvención, co límite de 1.000 €.

Aplicarase a compensación para o cobramento da sanción, agás que a entidade sancionada formule a oposición á sanción ata que se resolva o recurso.

Para outros incumprimentos e sancións non previstos neste apartado será de aplicación o disposto na normativa legal de subvencións".

OITAVA: CESIÓN EN PRECARIO DO LOCAL DE ENSAIO

Dada a natureza non lucrativa da Banda, e que da utilización privativa do local social e de ensaio non se desprende ningún beneficio económico para o Concello de Arteixo, e co fin de dar cumprimento ao disposto no artigo 92.5 da LPAP e 39 da LPG, a devandita Banda, para paliar así os gastos de mantemento (electricidade, limpeza, etc.) dos locais dos que dispón a asociación nos baixos do CCC de Arteixo comprométese a realizar seis (6) intervencións musicais participando coa súa presenza en actos municipais, dos que 5 como mínimo deben pertencer á Concellería de Cultura. En ningún caso se poderán realizar a beneficio de asociacións, comisións de festas ou similares nin xerar gastos engadidos para a Banda.

A realización destas accións queda fóra do réxime recollido no presente convenio, por non ter a consideración de actividade subvencionable, polo que a denuncia do mesmo ou a perda da subvención non implicará a extinción da presente obriga, salvo que abandonen os locais de ensaio e demais instalacións municipais.

Se o abandono do local se produce con posterioridade ao 1º semestre do exercizo, verá obrigada a realizar igualmente a totalidade das actuacións comprometidas.

NOVENA: LABOR SOCIOCULTURAL

O labor sociocultural que a Banda se compromete a realizar verase materializado, como mínimo, nos termos indicados no presente convenio.

DÉCIMA: LABOR EDUCATIVO

O labor educativo que a Banda se compromete a realizar verase materializada integrando como educandos dentro da súa colectividade a todo o alumnado da Escola Municipal de Música que sexan propostos/as polos/as mesmos/as e que estean interesados/as en formar

parte desta agrupación, complementando desta maneira os estudos musicais cunha agrupación bandística. Así mesmo coa formación continua dos resto dos seus compoñentes.

DÉCIMO PRIMEIRA: CONTRIBUCIÓN AO PATRIMONIO MUNICIPAL

A Banda comprométese a dotarse dun arquivo musical, e no caso de disolución, poñer a disposición do Concello de Arteixo todo o seu patrimonio.

DÉCIMO SEGUNDA: APROBACIÓN DO GASTO E PAGAMENTO

Considerando a especial natureza da actividade subvencionada e que para obter uns resultados de calidade a actividade formativa e educativa esta se realice dende o inicio do ano, é polo que se propón o recoñecemento da obriga do 50% da axuda comprometida (12.000,00 €) no momento da aprobación do presente convenio, e como pago anticipado con carácter de entregas de fondos previas á xustificación, como financiamento necesario para poder levar a cabo as actividades inherentes á subvención.

Producirase a perda do dereito ao cobro total ou parcial da subvención no suposto de falta de xustificación ou de concorrencia dalgunha das causas previstas no artigo 33 da Lei de subvencións de Galicia.

Comprobada e aprobada a conta xustificativa, o Concello procederá ao pagamento do 50% restante da subvención (12.000,00 €) mediante transferencia bancaria á conta do beneficiario.

Coa sinatura do presente convenio, a beneficiaria declara responsablemente non estar incurso en ningunha das causas reguladas no apartado 4º do artigo 31 da LSG, que impedirían o pagamento anticipado.

DÉCIMO TERCEIRA: SEGUIMIENTO E CONTROL DO CONVENIO

O seguimento será realizado conxuntamente, nos ámbitos correspondentes, polo presidente/a da Banda e a concelleira de cultura do Concello, dacordo coas súas funcións e competencias, emitindo a Banda en cada caso e momento os informes que se lle soliciten e sexan preceptivos, e como mínimo un Informe-Memoria final que acompañará á xustificación da subvención concedida.

DÉCIMO CUARTA: REINTEGRO

Cando transcorrido o prazo de xustificación esta non se efectuara, acordarase o reintegro dos posibles anticipos concedidos, previo requirimento expreso por parte do Concello, no prazo de 15 días, e sempre que, de conformidade co previsto no artigo 70 do RD 887/2006 non se tivera solicitado ampliación do prazo de xustificación.

DÉCIMO QUINTA: FORMALIZACIÓN

O presente convenio formalízase coa sinatura das partes dende a data que figura ao final deste convenio ata o 30 de novembro de 2019 e prorrogarase por períodos anuais, previa solicitude expresa do beneficiario no prazo de un mes anterior ao fin do mesmo.

Arteixo, 31 de xullo de 2019

Alcalde


Circular stamp of the Concello de Arteixo with the signature overlaid.

Carlos Calvelo Martínez

Presidente


Handwritten signature in blue ink.

Diego Romero Rial

Ante min,

Circular stamp of the Concello de Arteixo with the signature overlaid.

Secretaría Accidental

Eva María Montes Fernández

Ao corpo deste convenio xúntanse os anexos I e II cubertos en todos os seus apartados.

ANEXO I

COMPOSICIÓN ACTUAL DA BANDA DE MÚSICA SANTIAGO DE ARTEIXO (SENIOR)

Composición da Xunta Directiva:

Presidente:

D.N.I.:

Vicepresidente:

D.N.I.:

Tesoureiro:

D.N.I.:

Secretario:

D.N.I.:

Vogais:

D.N.I.:

Director:

Compoñentes:

Nome

Idade

Instrumento



ANEXO II

COMPOSICIÓN ACTUAL DA BANDA DE MÚSICA SANTIAGO DE ARTEIXO (XUVENIL)

Composición da Xunta Directiva

Presidente: D.N.I.:

Vicepresidente: D.N.I.:

Tesoureiro: D.N.I.:

Secretario: D.N.I.:

Vogais: D.N.I.:

Director:

Compoñentes:

Nome

Idade

Instrumento

